

14/02/2014 - Majlis Malam Anugerah MAKSAK Malaysia 2013

Bismillahir rahmanir rahim,

Assalamualaikum warahmatullahi

wabarakatuh, Salam Sejahtera dan Salam 1 Malaysia,

YBhg. Tan Sri Mohammad Zabidi Zainal

Ketua Pengarah Perkhidmatan Awam merangkap Timbalan Yang Dipertua MAKSAK Malaysia,

YB. Datuk Obet Tawil

Setiausaha Kerajaan Negeri Johor,

YBhg. Naib-Naib Yang Dipertua MAKSAK Malaysia,

YB. Yang Dipertua Badan-badan Gabungan MAKSAK,

YBhg. Tan Sri-Tan Sri, Puan Sri-Puan Sri, Dato'-Dato', Datin-Datin, Tuan-tuan dan Puan-puan,

Para tetamu yang dihormati sekalian,

Alhamdulillah, bersyukur kita ke hadrat Allah SWT atas limpah kurnia dan keizinanNya jua, dapat kita semua berhimpun dan bermesra sempena Malam Anugerah MAKSAK Malaysia Tahun 2013 di Dataran Mahkota yang indah ini. Sesungguhnya saya amat gembira dan berbangga kerana dapat bersama-sama saudara dan saudari sekalian dalam majlis pada malam ini.

2. Terlebih dahulu saya ingin merakamkan penghargaan dan terima kasih MAKSAK kepada Kerajaan Negeri Johor dan MAKSAK Johor selaku Jawatankuasa Penganjur yang sudi menjadi hos bagi Malam Anugerah MAKSAK 2013. Untuk makluman semua hadirin, ini merupakan satu

catatan sejarah buat MAKSAK apabila buat pertama kalinya Malam Anugerah MAKSAK diadakan di luar Kuala Lumpur dan Putrajaya. Syabas diucapkan.

3. Saya juga mengambil kesempatan ini untuk mengalu-alukan kehadiran para tetamu serta ahli Gabungan MAKSAK, dan merakamkan ucapan terima kasih atas sokongan padu serta kerjasama erat yang telah diberikan kepada MAKSAK Malaysia dalam penganjuran program-program MAKSAK sepanjang tahun 2013.

4. Malam Anugerah MAKSAK merupakan acara tradisi tahunan MAKSAK yang bertujuan mengiktiraf komitmen badan-badan Gabungan MAKSAK yang menyertai program-program MAKSAK sepanjang tahun sebelumnya, dan meraikan kejayaan individu tertentu yang telah mengharumkan nama Perkhidmatan Awam Malaysia di kejohanan-kejohanan sukan peringkat kebangsaan dan antarabangsa. Majlis ini juga bertujuan merapatkan ikatan ukhuwah di kalangan keluarga MAKSAK di samping meraikan, dan menghargai jasa semua pihak yang menyokong program-program MAKSAK selama ini.

Saudara dan saudari yang dihormati sekalian,

5. Tahun 2013 menyaksikan MAKSAK tampil dengan beberapa perubahan yang besar, antaranya:

- Membenarkan kembali kelab sukan, dan kebajikan agensi awam untuk memohon dan menerima sumbangan daripada pihak swasta mulai 13 Februari 2013 bagi menggalakkan penganjuran program-program sukan dan sosial;
- Menghidupkan kembali Kejohanan Olahraga MAKSAK yang kali terakhir diadakan pada tahun 2001, dan memperkenalkan Kejohanan Hoki Dewan (*indoor hockey*) MAKSAK yang pertama;
- Penganjuran Larian Hari Malaysia-MAKSAK yang diadakan buat julung kalinya sempena sambutan Hari Malaysia Ke-50 di Kuching, Sarawak; dan

- Pewujudan Facebook MAKSAK Malaysia sebagai medium sosial media MAKSAK untuk mempromosi program-program MAKSAK, selain mempromosikan amalan hidup yang sihat melalui sukan kepada penjawat awam.

Saya amat gembira dengan kejayaan ini, dan tahniah saya ucapkan kepada semua yang terlibat. Kejayaan ini saya kira merupakan satu testimoni semangat kekitaan, dan kerja berpasukan yang sememangnya menjadi tunjang MAKSAK selama ini.

6. Saya juga amat berbangga melihat kejayaan atlet Perkhidmatan Awam di kejohanan sukan antarabangsa seperti Sukan SEA Ke-27 di Myanmar dan kejohanan-kejohanan sukan di peringkat Asia dan dunia. Sebagai tanda penghormatan, dan penghargaan terhadap pengorbanan dan jasa mereka kepada negara, saya telah menyampaikan Skim Insentif Sukan MAKSAK kepada 33 atlet Perkhidmatan Awam dalam satu majlis khas yang telah diadakan di Putrajaya pada minggu lepas. Insentif ini merupakan satu manifestasi dan sokongan padu MAKSAK kepada atlet Perkhidmatan Awam, dan sebagai satu bentuk motivasi bagi mereka dan atlet-atlet lain untuk terus berusaha mencapai kejayaan dalam sukan masing-masing.

7. Kehidupan yang cergas dan aktif adalah penting untuk kesihatan tubuh badan, dan seterusnya akan menghasilkan fikiran yang cergas dan minda yang segar dan progresif. Ini adalah selari dengan salah satu daripada enam prinsip utama dalam Konsep Merakyatkan Perkhidmatan Awam iaitu 'Insaniah', iaitu penjawat awam perlu menyeimbangkan antara kehidupan rohani dan kesihatan jasmani dalam cara kita bekerja demi memantapkan lagi Perkhidmatan Awam Malaysia sebagai sebuah perkhidmatan yang unggul. Saya juga menyeru semua pihak untuk menghayati prinsip-prinsip lain dalam Konsep Merakyatkan Perkhidmatan Awam iaitu keterbukaan, turun padang, musyawarah, kekitaan dan kerjasama awam-swasta-NGO, dan menjadikannya sebagai panduan dalam pelaksanaan program-program sukan, sosial dan kebajikan di jabatan masing-masing.

Para hadirin yang dihormati sekalian,

8. Selaku Yang Dipertua MAKSAK Malaysia, saya sentiasa menyokong dan komited terhadap pelaksanaan program-program yang mampu menjulang nama MAKSAK dan Perkhidmatan Awam Malaysia. Sehubungan itu, ingin saya umumkan di sini bahawa Malaysia akan menggalas tanggungjawab sebagai Pengerusi ASEAN pada tahun 2015, dan MAKSAK Malaysia telah mengambil inisiatif untuk menjadikan Malaysia sebagai tuan rumah bagi 'First ASEAN Public Service Games' pada tahun 2015, dan saya pasti negara-negara anggota ASEAN yang lain akan memberi sokongan yang sepenuhnya, InshaAllah. Kejohanan ini bakal mengumpulkan atlet dan pegawai Perkhidmatan Awam di kalangan negara-negara anggota ASEAN dalam satu kejohanan sukan berbentuk karnival. Saya amat teruja dengan idea ini dan percaya program ini mampu

melonjakkan nama MAKSAK Malaysia serta memberi peluang kepada atlet perkhidmatan awam untuk meningkatkan prestasi demi membawa nama perkhidmatan awam Malaysia di peringkat Asia Tenggara dan global. Semestinya pihak MAKSAK Malaysia memerlukan sumbangan tenaga, kepakaran dan pengalaman dalam menjayakan kejohanan ini, dan saya percaya ramai di kalangan kita yang akan menyumbang dalam penganjuran kejohanan ini dalam pelbagai kapasiti.

9. Kepada bakal penerima anugerah pada malam ini, tahniah dan syabas diucapkan. Semoga kejayaan ini akan menjadi inspirasi kepada semua atlet Perkhidmatan Awam untuk terus cemerlang dalam bidang sukan dan menjadi *role model* kepada para penjawat awam yang lain. Semoga pengiktirafan ini akan menjadi obor pembakar semangat kepada para penggiat sukan dalam perkhidmatan awam untuk terus aktif, dan menyokong pembangunan industri sukan tanahair sebagai salah satu penjana ekonomi negara. Sebagai inspirasi bersama, saya ingin memetik kata-kata lagenda bola keranjang dunia, Micheal Jordan.

"I've missed more than 9000 shots in my career. I've lost almost 300 games. 26 times, I've been trusted to take the game winning shot and missed. I've failed over and over and over again in my life. And that is why I succeed."

10. Akhir kata, saya merakamkan ucapan setinggi-tinggi penghargaan, dan terima kasih kepada semua Ahli Jawatankuasa Kerja, Yang DiPertua MAKSAK dan Setiausaha Kehormat Badan Gabungan, dan tidak lupa juga kepada bekas kepimpinan tertinggi MAKSAK yang telah dilantik ke jawatan yang baru ataupun yang telah bersara. Terima kasih yang tidak terhingga kepada semua pihak yang bertungkus lumus di belakang tabir dalam memastikan Majlis pada malam ini berjalan dengan lancar dan meriah.

11. Melihat kepada momentum 2013, saya menaruh penuh kepercayaan bahawa program-program yang bakal diperkenal, dan dilaksanakan pada tahun 2014 akan memberi impak dan *outcome* yang diinginkan serta menjadi penghubung dalam mengeratkan tali silaturahim di kalangan penjawat awam yang berbilang kaum. Izinkan saya mengakhiri ucapan saya dengan serangkap pantun.

Dari Kluang ke Gunung Pant
Beli suasa di Kota Tinggi
Selesai sudah ucapan diberi
Di lain masa bersua lagi

Sekian,

Wabillahittaufik walhidayah
Wassalamualaikum warahmatullahi wabarakatuh.

